

von Sicione bis gen Elidem gelauffen / die
hundert vnd fünffzig Meilen von einander
gelegen: vnd setzet noch ein ander Wunder-
werck hinzu / nemlich / daß in Consulatu
Fontej vnd Vipfanij, ein Kind von neun
Jahren / von Mittag an bis auff den Abend /

fünff vnd siebenzig Meilen sey gelauffen.
Über diesen Votten / so wol mögen Currirer
genennet werden / wollen wir die Leser sich las-
sen verwundern / vnd vns vnter dessen nach
einer andern Profession vmbsehen.

A N N O T A T I O

Über den Vier vnd vierzigsten Discurs.

Alexander ab Alex. hat lib. 2. cap. 2. Dierum genialium, viel Exempel solcher Personen / die
gute Currirer hetten gegeben / allda der günstige Leser mag nachsuchen.

Der Fünff vnd vierzigste Discurs.

Von Springern / Tänzern / vnd allerhand Tripudian-
ten vnd Wettlauffern.

Swollen etliche / es sey die
Springkunst (ins gemein da-
von zu reden) erstlich von et-
nem Weibe / so Thymele ge-
nannt / erfunden vnd auffge-
bracht worden / deren Martialis gedencet in
diesem Vers:

Qua Thymelem spectas, derisoremque
Latinum.

Iliodoros lib. 18. Etym. erzehlet auß Varro-
ne, daß die Saltatores, oder Springer / ihren
Anfang haben von einem Arcade, so Salius
genennet / welchen Aneas mit sich in Italiam
gebracht / allda derselbige die Springkunst zu
erst andere gelehret hat. Die weil aber dz wort /
Saltare, springen / gar zu gemein / vnd in sich
begreiffet nicht allein die einzige Sprung / son-
dern auch alle / beydes alte vnd neuwe Tänze /
die man auff Hochzeiten / vnd andern Freu-
denfesten pfleget zu vben / vnd darüber sich die
narrische Jugende mit grossen Fleiß bemü-
het / sie zu lernen / daß sie auch mit Ehren be-
stehe / wollen wir erstlich ins gemein davon re-
den / vnd hernach / damit nichts vnterlassen
werde / alls insonderheit von einer jeden Gat-
tung handeln.

Was nun das künstliche Tanzen anlan-
get / dz inen junge Leut also lassen belieben / daß
sie es auch bis in die Mitternacht hinhin füh-
ren / vnd doch nicht müde werden / bestehet
dasselbige nur in einer fleissigen Ordnung der
Geberden / vñ der Schritt oder Tritt / so nach
dem Klang eines Seitenspiels / oder anderer
Instrumenten / gerichtet werden / damit sie die
gröste Thorheit / so in der Welt seyn möchte /
sein zierlich / wie sie vermeynen / weißlich vnd
lieblich verrichten vnd begehen mögen / welche
wann sie nicht mit dem Klang des Spiels
wäre temperirt / für ein Nasen / ja für die Thor-
heit selber möchte geachtet werden: wie dann

in der ganken Welt kein narrischer vnd läp-
pischer Spectaculum kan seyn / als eben die-
ses / wann man solche Meyen von fernem si-
het / da man das Spiel nicht höret.

Es ist aber solches Tanzen vnd Lust darzu /
nichts anders / als eine anzeigung eusserster
Leichtfertigkeit / Zunder zu aller Vppigkeit /
reizung zur Vhzucht / Feindt der Zucht / der
Schamhaftigkeit zuwider / der Erbarkeit ab-
hold / nicht werth / daß sie in des Caci spelun-
ca, wolt geschweigen / in den Königlichē Pal-
lästen vnd Keyserlichen Sälen solte wohnen
vnd zugelassen werden / da doch beynähe keine
andere / als diese schändliche Kurzweil vnter
adelichen Jungfrauen vnd Rittern im
schwung gehet.

Wie aber nichts so schlimm / es findet doch
endlich seinen Käuffmann oder Lober / also ist
es auch hiemit beschaffen. Dann ob es schon
nicht lobens werth / so haben sich doch etliche
Griechische Scribenten / dasselbe zu loben / nit
geschämet / diese Kunst geschmücket vnd com-
mendirt / da sie doch in sich selbst ein Schew-
sal vnd schändlich / den Katzen vnd Affen /
wann die mit einander spielen / mehr möchte
ziemen / als vernünfftigen Menschen / beydes
männliches vnd weibliches Geschlechts / wel-
che irer Vernünfft vnd Ehre nicht so schänd-
lich / als leichtfertig solten vergessen.

Dahero etliche / damit sie es ja möchten an-
genem machen / fürgeben / es hab solches Tan-
zen seinen Anfang vnd Anweisung an des
Himmels Lauff / nemlich an der bewegung der
Sternen vnd der Planeten / welche bald für-
sich / bald hinder sich / bald gegē einander lauff-
en / einander empfaben / welches nichts an-
ders sey / als ein harmonischer Tanz der cor-
porū cælestium, welcher von anfang der er-
schaffung der Welt gewäret hab. Etliche sa-
gen / es sey eine Inuentio der Satyrorum, vnd

G g iij gebet